



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 3 Yangia anidakangma : Tir Yimiyim tir_yimiyim

tir yimiyim TAPAK 8

**Mumbai amakba nung shilem agir
Abdul Rehman Makki süogo**

**Halep yiruba ajanga
Australian Open masayatsü**



VOL. XXII ISSUE NO. 76 (ADOK 76) DIMAPUR KÜPTOKNÜ (SATURDAY) LUCHII (DECEMBER) 28, 2024 ₹ 5.00

Tanü Nigambodh Ghat nung Manmohan Singh indang asüpila sentong agitsü

New Delhi, Luchii/December 27 (Agencies): Taoba Ato Kilonser Dr Manmohan Singh indang tatempangba tepila sentong ya Honibar anüngdang 11:45 ako nung Delhi nung aliba Nigambodh Ghat nung konang tetushi ajak agüja agitsü.

Union Home Ministry ajanga sangdong ka nung ashiba agi, taoba PM atema state funeral agitsü, shiba arishi küm 92 lia Brehostibarnü AIIMS nung asü.

Ano defence ministry ajanga sangdong ka nung President, Vice President, Prime Minister, Lok Sabha Speaker, Defence Minister, Cabinet Secretary aser dangar temi leper nung naroyutsüsü, ta metetdaksü.

Hokulbarnü nüburtemi asükhu lemsatepsü atema Singh indang tasümang ya 3, Motilal Nehru Road nung par kidang ayutsü. Honibarnep 8:00 ako nung pa tasümang ya AICC headquarters-i bener aotsü aser anepdang 8:30 – 9:30 tsüngta

nübur aser Congress workers temi akhum agütsütsü maongka angutsü.

Iba sülen Dr Singh indang tasümang ya AICC office nungi anepdang 9:30 ako nung leperi bener aotsü.

Taoba ato kilonsertem asüba mapang sorkari yimya kar amshir. Aser iba ama Dr Singh indang tasümang ya national flag (tricolor) agi zübangtsüsü aser funeral procession agitsü. Iba den külemi akhum agüja 21-gun salute agütsütsü.

Linük ajunga nung anogo tenet mang ayimsü sangdongogo, aser iba mapang linük tesem ajungalen linük nisan tom nung atsüzüksü. Mangyimba mapang lokti sentong mesüra official sentong kecha magitsü.

Singh-i India nunger puti otsü nung temelenshi tajung aika arudaksür iba lima nungi pilar. Pai kinungsü Gursharan Kaur den jala asem yutsür asü.

Ni Tsüngrem dak amanger, aser Tsüngrem asen den lir: Vladimir Putin

St. Petersburg, Luchii/December 27 (Agencies): Vladimir Putin-i Ukraine den raraba nung Russia-i takok angutsü tamang kateta lir ta ashi.

St. Petersburg nung Supreme Eurasian Economic Council (SEEC) senden ka nung Moscow-i 2025 nung takok angutsü asü masü ta asüngdang dang, Tsüngrem par linük den lir, ta Russia tiri langzü.

NATO nung Ukraine züngsem akumtsüba maparen menutsü mechi front lines nung rara anena atatsü US-i sentong kar tenzüksü südi ta osang angashiba mapang, “Ni Tsüngrem dak amanger. Aser Tsüngrem asen den lir,” ta pai ashi.

Ajisüaka Vladimir Putin-i iba osang nung mamanger ta ashi aser US Tir Joe Biden-i 2021 nunga iba mesük ken o benokdanga liasü ta ashi. “Iba

mapang onoki US dang iba amala tezüngzüktep ya Moscow asoshi tamakotsü ta shia lir,” ta pai ashi.

2025 küm Moscow asoshi tongtipangtiba teinyaktsüji Ukraine nung takok angutsüya lir, ta Putin-i ashi.

US tir inyaktsü shima alisang Donald Trump-i office mapa agizüker ghonda ishika tsüngta Russia aser Ukraine tsüngta ceasefire ka lidaktsütsü ta shir aliba mapang Putin-i iba o ya jembu. Ajisüaka iba sentong indang osang tejangja melemsatep.

Kremlin nung December 22 nü Slovakian Ato Kilonser Robert Fico den ajurutepsang Vladimir Putin-i ashiba agi, iba mapang Slovakian ketdangsür temi ken o jembitsü asoshi sapang ka ama par linük pelashishia agütsütsü mulunga lir ta Fico-i pa dang ashi.

Manipur nung khatepdang police aser yimdaklir yiru

Imphal, Luchii/December 27 (Agencies): Hokulbarnü Manipur kübok Imphal East district nung prangbong bena alirtem den khatepdang police ka densema nisung ana yiru.

Tenemlen nungi prangbong bena alirtemi Sanasabi aser Thamnepokpi yimtsüngtem nung prangbong aser bomb agi amak tenzükdang iba lendong ya atalok. Security forces temi meyipar akha aser iba mapang kanga sashia khatepa liasü.

Police temi ashiba agi Sanasabi

yimtsüng nung arishi küm 37 tain police, K Haridash dak tabubang abelen injang agi yirutsü.

Pa ya kanga kera Jawaharlal Nehru Institute of Medical Sciences bushia anir ao aser surgery tilaka agitsü lir.

Kasa mapang ‘village volunteer’ ka teka tera yirua private hospital kati anir ao aser pa temang tajungba lir. Security forces den külemi item volunteers yagi nok-nü bener timtem agütsür den raraba nung shilem tajung agir.

Lokti tentet balalai Dr. Manmohan Singh asükhu lemsateper



Hokulbarnü Delhi Chief Minister Atishi-i New Delhi nung taoba Ato Kilonser Dr Manmohan Singh tasümang jakdang nokdaker pa nem akhum agütsüdang tangokba noksa nung angur.

Dimapur, Luchii/December 27 (TYO): India indang taoba ato kilonser Dr. Manmohan Singh, December 26, 2024 nü AIIMS Hospital, New Delhi nung asüba mechi Home Department, Government of Nagaland ajanga asür nem akhum agüja Nagaland nung December 26, 2024 nungi January 1, 2025 tashi ‘State Mourning’ alitsü ta sangdongogo.

Iba mapang National Flag ya state nung teti songa aliba tesem nung tom tashi atsüzüka alitsü. Maneni iba mangyim mapang ‘official entertainment’ kecha malitsü, ta sangdong ajangasa metetdaksü.

Nagaland Pradesh Congress Committee (NPCC) indang Communications Department-ia sangdong ka nung nukla tajung aliba lenir aser taoba ato kilonser Dr. Manmohan Singh asüba atema asükhu lemsatepa liasü.

2004 nungi 2014 tashi pa ato kilonser inyakdang asen linük ya yimtenren aser rongsenketzüng tsütsü tashi tait linük ka kuma aniteta tasü tait mulungsentsü den mangdang tajung yur temelenshi jenti bener aruja nüburtem yimchiyimjung nung lidaktsü, ta NPCC sangdong ajanga ashi.

Pa asüba ya linük asoshi

melentsü makokba takoksa tulu alitsü aser pai mapa tajung inyaka yutsüba ajanga asen linük putu aika ajungmesotsü.

NPCC ajanga par kibong den asükhu lemsateper aser asür tanüla teti tatem maka tesunep nung anisüngzükjangma, ta NPCC sangdong ajangasa ashi.

Taoba ato kilonser Dr. Manmohan Singh asüba osang angashia aoksar aser kanga jashir, ta NSCN/GPRN sangdong ka ajanga ashi.

Pa ya Naga nunger yimten ken o bentettsü asoshi tejangraba tulu nung aliba India indang ato kilonser ka liasü. Collective Leadership, NSCN lenisüba nung Naga delegation oa New Delhi nung December 7, 2004 nung pa ajurudang, “Ajaki akumtsüboa agizüktettsüsa tangatettep kati arutsü asoshi inyaktsü kasa tejangraba nung lir. Iba tebilemstü bentetba nung asenok ajaki nendaka agütsür inyaktsü. Asenoki temulung agüja iba ken o bentettsü,” ta pai ashiba tang tashi bilemteter, ta NSCN sangdong ajanga ashi.

“Solution bener arutsü asoshi asenok külemi lenmangtem bushitsü. Ajaki angatettepa jembitsü nüngdaker, aser ibaji ajanga ajak asoshi agizüktettsüsa solution bener arutettsü,” ta pai shia liasü.

Pa India indang ato kilonser inyakba mapang NSCN den jembitsü atema pai minister asem tashi yok. February 9, 2005 nung pai Naga delegates dang “Tesendaktep yimya bentettsü,” ta shia liasü.

Pai New Delhi nung pa aliba kidang June 24, 2005 nü Chief Negotiator Th. Muivah den tejak jitepa mener jembidang, “Yimjung nung iba tebilemstü bentettsü züngzünga, temulung agüja aser temulung kateta lir, nenoki onok atasatsüla. Asenoki mera tajung agi tenzükogo. Onoki nenok mezüngshii mali,” ta pai shia liasü, ta NSCN sangdong ajanga ashi.

Naga yimten ken o bentettsü asoshi pai tasü ita aser temulung agüja inyakba atema pa nem tenüngsang agütsür. Pa ama ka den tajangshibatem Naga nungeri kodanga mamadoktsü.

Par kinunger aser tembarmen den asükhu lemsateper. Pai jembizüka yutsüba aser inyakbatem Indo-Naga puti otsü nung alitsü. Pa asüba ya Naga nunger asoshi lenir tajung ka samaba alitsü, shiba India aser Nagalim ajungai agizüktettsüsa Naga nunger yimten ken o bentettsü asoshi teti nokdakba lenir ka liasü. Pa tanüla teti tatem makadak anisüngzükjangma, ta NSCN sangdong ajangasa ashi.

(CRPF) nungi personnel tem densema security forces temi khatepba mapang tetsür, tanur aser teintet rogo kar kumzüka liasü.

Taoba küm May ita nungi Manipur nung Meitei aser Kuki-Zo kin tsüngta azüdokshia arudang nisung 250 dak tema takum samaogo aser ano meyirijang aika pei ki yutsür tesem balala nung prokshia lir.

Ano Imphal West district nunga mejangjaba nisung temi doctor ka indang kima hand grenade ka yuja liasü. Iba grenade

den “KCP (PWG) last warning” ta zülur yuja liasü.

Iba tatalokba ya tashiyim amshia senotsü meshiba dak sendaka lir südi ta police temi temulung melemteti lir aser bushisüngdangba mapang lir.

Police temi iba grenade ya agientsüogo.

Nokdanga aliba telungpur telok, Kangleipak Communist Party (People’s War Group) yagi Imphal Valley nung tashiyim amshia senotsü meshiba maparen kanga inyaker.

Northeast lenirtemi Dr Manmohan Singh nem akhum agütsür



Guwahati, Luchii/December 27 (Agencies): Northeast India nung yimtenren tentet balala nungi lenirtemi taoba ato kilonser Manmohan Singh nem akhum agütsür, shiba Brehostibarnü asü.

India indang rongsenketzung aser yimtenren tsütsü pai mapa tulu inyaka lir.

Assam Chief Minister Himanta Biswa Sarma-i asür Manmohan Singh nem akhum agüja state nung anogo tenet mang ayimtsü sangdong.

Iba mapang state government establishments ajunga nung national flag tom nung atsüzüksü aser official entertainment sentong ajunga athitsü.

AGP tetsüti aser senior Minister Atul Bora-ia pa nem akhum agüja, "Taoba ato kilonser Dr Manmohan Singh

asüba ajanga ni kanga jashir. Tashi temeteter aser economist ka, pa ajemaluba, aria bilemba aser linük ketdangsüba yimya tajungtem teti asen linük puti otsü nung amshitsü. Pa Assam den tesendaktep tajung liasü, asen state tenüng nung Upper House of Parliament nung züngsem ka ama inyakba ajanga ano tesendaktep balaka lidaktsü," ta ashi.

Nagaland Chief Minister Neiphiu Rio-ia mangyim tejashi lemsatep aser India indang rongsenketzung terenlok nung tongti shilem agiba bilemteta liasü.

Manipur Chief Minister N Biren Sing aser Arunachal Pradesh Chief Minister Pema Khandu natia asükhu lemsatep aser mangdang tajung akaba lenir dang pelaba metetdaksü.

Assam Pradesh Congress

Committee president Bhupen Kumar Borah-ia, "Taoba PM Dr Manmohan Singh asüba ajanga temulung shiranga jashiba rasaa ashitsü o maka," ta shia liasü.

Assam nungi Congress lenir aser taoba minister Ripun Bora-i sangdong ka nung, "Assam nung minister ka ama inyakba mapang Assam indang ken o balala nung Dr Manmohan Singh den ajuruteptsü maongka anguba ni bilemteter. Ano Rajya Sabha züngsem ka ama ni pa den kü tangatetba lemsateptsü maongka angü," ta ashi.

Dr Singh ya küm 33 tashi tezükba sülen Rajya Sabha züngsem ka ama 2024 küm April ita mapa nungi anisüngzüka liasü. Pa PV Narasimha Rao sorkar nung Finance Minister akumba sülen 1991 küm Rajya Sabha nung züngsem akum aser iba mapang rongsenketzung tsütsü temelenshi mapa jenti inyak.

Asür Dr Singh ya September 26, 1932 küm Gah, Punjab, undivided India nung aso aser pa Cambridge aser Oxford nung züngser 1972 küm Chief Economic Advisor akum.

Pa RBI Governor ka ama 1982-1985 tsüngta inyak aser 2004 nungi 2014 tashi ato kilonser inyaka liasü.

Changlang nung NSCN-IM züngsem ana apu

Guwahati, Luchii/December 27 (Agencies): Arunachal Pradesh nung security personnel telok kati Changlang district kübok Rima area nungi National Socialist Council of Nagaland-Isak Muivah (NSCN-IM) züngsem ana apu.

Tena ya Roney Rai alias Tutu (31) aser Anong Singpho (30) ta jangjaogo aser yangji aliba shishilempar aser dokan kibur dang tashiyim amshia senotsü meshiba dak sendakba nung tena ya apu.

Ittangiterba osang tejangja nung ajemdaker Sub Mahesh

Singh of 11 PARA (SF) lenisüba kübok 11 PARA(SF), 10 Assam Rifles, aser Changlang Police ajanga iba operation ya agia liasü.

Iba operation ya anepdang 3:00 ako nung tenzük ta police-i ashi.

Operation mapang security forces temi tena ket nungi hadir kar ngutet.

Tena ket nungi .32mm pistol ka den injang trok, linok (sickle) ka den phone ka aser kuli kaket kar ngutet.

Tena dang police temi tang asüngdangyaba mapang lir, ta sangdong ka ajanga ashi.

GPRN/NSCN (U) nung Renben Mozhui mali

Dimapur, Luchii/December 27 (TYO): Renben Mozhui ta sür nisung ka apuba otsü agi social media sünga lir aser news sites nug pa ya NSCN (U) indang Undersecretary ta shia lir. Iba sangdong ya khenyongi tai aser onoki magizüker, kechiaser GPRN/NSCN (U) nung renben Mozhui

ta sür nisung shinga mali, ta GPRN/NSCN (U) indang sangdong ka ajanga ashi.

Pa ya ozü züngsema masü aser onok pa den tesendaktep kecha mali. Anungji tim ketdangsür dang iba tasa bushisügdanga tapet temerenshi agütsütsü ajungshir, ta sangdong ajangasa ashi.

Tezpur University nungi nisung 1,363 nem degrees agütsüogo



Guwahati, Luchii/December 27 (Agencies): Hokulbarnü Tezpur University indang 22 buba convocation sentong agidang kaketshir 1,363 nem degrees agütsüogo.

Iba sentong ya Assam Governor aser Tezpur University Chancellor Lakshman Prasad Acharya lenisüba kübok agia liasü.

Kaketshir 49 nem gold medals agütsü aser item rongnung Sumantra Choudhury (B.Tech in Food Engineering and Technology) ajanga Best Graduate Award aser Abhinav Hazarika (Integrated M.Sc in Chemistry) ajanga Best Postgraduate Award ngua liasü.

Prof. Mamidala Jagadesh Kumar, Chairman, University Grants Commission (UGC) ajanga convocation o jembidang kaketshirtem dang tayongzükba tem maongka ama angatettsü ayongzük.

"Tangbo asenok ya global citizenry nung shilem ka lir. Asenoki ajangshiba teblemtsü aika, tatishitsü agi tzu-mopung melenba aser kangasa makamaitba, ajak ya yimya kasa dang lir. Anungji asenok asoshi khuret abentsüla," ta Prof. Kumar-i ashi.

Prof. Kumar-i Aditya L1 aser India indang digital payments system tatishitsü

amshia India nunger lanur dang linük tajungba kuma melenshitsu ashi.

"Fortune 500 company tem repringdangang, aika nung India nunger tekolak lir. Parnok ya asen education system nungi adokba lir," ta pai ashi.

Pai National Education Policy (NEP) tenüng asang aser ibai constitutional values nung ajemdaker lir, kong skill nung rangloker shisaliok agütsür, ta ashi.

Governor Acharya-i jembidang kaketshirtem dang lokti aser linük asoshi pei teinyakstütem angatetdaksü.

"Education ya shisatsü aser skills anguba nung metembanger. Chichiba shisaliok yagi osangtsüasang agütsüba kisung masü saka dangar dang temeim sayuba, aria bilemba aser külem meimchir asoshi tajung bilema inyakba dena lir."

Prof. Shambhu Nath Singh, Vice Chancellor, Tezpur University ajanga graduate asüba kaketshirtem dang temelenshi bener arur ka-ka akumtsü ayongzük.

Prof. Singh-isa university nung Economics, Psychology, Political Science, Geography, Performing Arts, aser Tribal Studies indang department tasen amenoktsü sentong aliba indang lemsatepa liasü.

Arunachal nung jala tepsettsü merangba mechi tebu apu



Itanagar, Luchii/December 27 (Agencies): Arishi küm ka tanur tepsettsü merangba ken o nung tebur ka Itanagar indang D Sector nungi Mongulbarnü apu. Pa kinungtsü Kioda Yapi-i

December 23 nü FIR ka benokba nung la kinungbo arishi küm 33 tain Kioda Babu-i küm aika kidang rongrong agüja merenshi ta ashiba sülen iba tatalokba temai adok.

FIR ajanga ashiba agi, September 13 nü Babu yagi pa kinungtsü dangi WhatsApp video ka yokba nung par jala ya tekong nung süngzü inoker alenseta südaksütsü merangba sayua liasü.

Iba ama mapa tamajung inyakba yong BNS Act indang Section 85 aser Juvenile Justice (Care and Protection of Children) Act, 2015 indang Section 75 kübok ken o benoka liasü.

Tetsürla indang kuli bendenogo aser ken o ya SI Dopi Pakam ajanga bushisügdangba mapang lir.

Babu ya puer Yupia judicial magistrate first-class dangi anir aru aser pa judicial custody nung yua lir.

Arunachal Pradesh State Commission for Protection of Child Rights-ia suo moto notice ka agütsüogo aser police dang nungi osang meshia lir.

SYMBOLIC POSSESSION NOTICE

ICICI Bank Branch Office: ICICI Bank Ltd, BP-4, Technopolis Building, 4th Floor, Sector V, Salt Lake City, Kolkata West Bengal- 700091
CIN No: L65190G11994PLC021012, www.icicibank.com

Securitisation, Reconstruction of Financial Assets and Enforcement of Security Interest Act, 2002 aser Security Interest (Enforcement) Rules 2002 nung section 13(12) aser Rule 3 nung agüja aliba tashi amshia tashi agüja aliba ICICI Bank Officer-i tsünglanglen shia aliba sen apur (tem) nem Demand Notices agüja Notice agütsüba anogo nungi tenzükba anogo 60 tsüngda Notice nung shia aliba sen agüjang ta metetdaksü.

Ajisuaka parnoki senji magütsütet nung sen apur aser public dang tsünglanglen sign süa aliri shia aliba Act nung Section 13(4) aser shia aliba Rules nung Rule nung agüja aliba tashi amshia tsünglanglen shia aliba anogo nung tsünglanglen shia aliba kiojen agiadokogo. Talisa sen apur aser public dang iba kiojen dak sendakba nung inyaksangshi kecha masütsü metetdaksür. Iba kiojen dak sendakba nung inyaksangshi süra senji ICICI Bank Limited nem agütsütsüba akumtsü.

Sr. No.	Name of the Borrower(s)/ Loan Account Number	Description of Property/ Date of Symbolic Possession	Date of Demand Notice/ Amount in Demand Notice (Rs)	Name of Branch
1.	Amal Bahadur Newar/ Januka Newar/ Area/ Locality/ Sector Village Dowangbari Town/ City Lokra Dafala Gaon, P.O. Lokra District Sonitpur Assam Sonitpur-784102/ LBGUW00006879421/ TBGUW00006852608	Dag No.18, Periodic Patta No.10, Village Sonai Nepali, Mouza Chariduar Circle Chariduar, District Sonitpur, Assam Admeasuring An Area Of Land Measuring 2 Katha/ Date Of Symbolic 20.12.2024	September 09, 2024 Rs. 35,92,673.24/-	Sonitpur/ Kohima

Tekalen shia aliba sen apur (tem)/guarantor(tem) dang sentsüh aotsü atema anogo 30 nü Notice agütsür, mesüra Security Interest (Enforcement) Rules 2002 nung Rule 8 aser 9 nung aliba ama iba Notice agütsüba sülen anogo 30 lirbo mortgage süa aliba kiojenji ayoktsü, ta metetdaksür.

Date: December 27, 2024
Place: Kohima

Sincerely Authorised Signatory For ICICI Bank Ltd.

PM Modi den lenir aikati Manmohan Singh nem akhüm agütsü



December 27, 2024 nü New Delhi nung Ato kilonser, Narendra Modi-i taoba mapang Ato kilonser, Manmohan Singh mangjak nung asür nem akhüm agütsüdang tangokba noksa nung angur.

New Delhi, Luchii/ December 27 (Agencies): India nung Ato kilonser 14buba, Dr Manmohan Singh Brihostibar nikongdang temang mejungi AIIMS Delhi emergency unit-i anir oa anepalua yari, saka aonung 9:51 ako nung süadok; pa arrshi küm 92 liasü.

Dr Manmohan Singh ya 2004 küm nungi 2014 küm tashi Ato kilonser inyaka liasü. Iba jakdang pa 1991 nungi 1996 küm tashi Union Finance Minister inyaka liasü.

Iba jakdang pa Commerce Ministry nung Economic Advisor inyak, iba sülen Ministry of Finance nung Chief Economic Advisor, Ministry of Finance nung Secretary, Planning Commission nung Deputy Chairman, Reserve Bank of India nung Governor aser University Grants Commission nung Chairman inyaka liasü.

Hokolbarnü Ato kilonser, Narendra Modi aser Lok Sabha nung opposition lenir, Rahul Gandhi na densema tongti lenirtem aikati pa nem akhüm agütsüogo.

India nung lenirtemi dang masü saka US, Canada, France aser Sri Lanka nungia lenirtem aikati Manmohan nem akhüm agütsü.

Congress Tir, Mallikarjun Kharge, Congress Parliamentary Party chairperson Sonia Gandhi, AAP tongti lenir Arvind Kejriwal, Delhi Chief Minister Atishi aser Rajya Sabha MP Sanjay Singh nungeria Manmohan Singh'er ki semdanga asür nem akhüm agütsü.

Kejriwal-i X ajanga, "Taoba mapang Ato kilonser Dr. Manmohan Singh nem akhüm

agütsüogo. Iba ama mapang ka nung par kibong züngsemtem ajurua mangyim jashi lemsatepogo. Dr. Singh ya mangdang aliba lenir ka liasü; linük nung rongsenkettzüng tsütsü temelenshi aika benoka pai tongti shilem agi aser pa dak ajemalu shisatsü ajanga nisung aika kongshiogo," ta metetdaksü.

Tibet nunger yimsü lenir, Dalai Lama-i shidi ajanga Singh kinüngtsü, Gursharan Kaur dang, "Kü sarasadem nung ni pa bilemettsü. Tang ama mapang ka nung ni na aser ner kibong den mangyim jashi lemsateper. India nung terenlok aser azükaru atema pai kanga tongti shilem agiogo, talisa rongsenkettzüng aintsü aser India nunger taküm jenjang tajungba akümtsü atema inyakogo. Pa ya Tibet nunger atema-a medemer tajung ka liasü," ta lemsatep.

Rashtriya Janata Dal MP, Manoj Kumar Jha-i, "Dr Singh-i pa Ato kilonser asüba mapang Bihar nung terenlok atema inyakogo. Akhidang nungi Bihar ya terenlok maliba region ka, anungji tanga states meneptsü atema Bihar-i teyari balaka nungdaker, ta pai angateta liasü," ta ashi.

RSS tongti lenir Mohan Bhagwat aser general secretary Dattatreya Hosabale natia külem sangdong ka ajanga, "Taoba mapang Bharat Ato kilonser aser linük nung lenir tain, Dr. Sardar Manmohan Singh asüba atema linük nüburtem ajak jashir. Rashtriya Swayamsevak Sangh-i par kibong aser pa meimer ajak den mangyim jashi lemsateper," ta metetdaksü.

JDS tongti lenir, H D Deve Gowda-i, "Manmohan asüba ya

linük atema takoksa tulu. Linük rongsenkettzüng tsütsü timtem tulu aliba mapang pai linük kümzüka liasü," ta metetdaksü.

NCP-SCP MP, Supriya Sule-i, "Pa ya tangar dang nungi alakteta balaka liasü. Ni pa ajurua pa den jembitsüsa maongka angu, Parliament nung pai jembiba o angatsüsa maongka anguba ya ni atema temoatsü liasü. Pa ya alima nung lenir tajungtibatem rongnung ka liasü," ta ashi.

Manmohan Singh den tatemangbuba sentong Honibarne 9:30 ako nung All India Congress Committee headquarters nungi tenzüksü aser tasü mang rongdokba tesem tashi mang bener aoba sülen mang rongdoktsü, ta Hokolbarnü Congress party general secretary KC Venugopal-i metetdaksü.

"Nüburtem nem akhüm agütsüdaksütsü atema Singh tasü mang Hokolbar tashi Motilal Nehru Road nung par kidang ayutsü. Asüngnep 8:00 ako nung pa tasü mang AICC headquarters-i bener aotsü. Yangji public aser Congress nung inyakerteri 8.30 ako nungi 9.30 ako tashi asür nem akhüm agütsütsü. Iba sülen mang arondaki bener aotsü," ta Venugopal-isa metetdaksü.

Singh-i 1987 küm Padma Vibhushan award angu, 1993 aser 1994 küm naprongla nung Asia Money Award for Finance Minister of the Year angu aser 1993 küm Euro Money Award for Finance Minister of the Year ngua liasü. Paise Cambridge aser Oxford densema nungtugu university aika nungi honorary degrees nguogo.

Singh-i pa kinüngtsü Gursharan Kaur den jala asem toktsür pilar.

Mumbai amakba nung shilem agir Abdul Rehman Makki süogo

New Delhi, December 27 (Agencies): 2008 küm November 26 nü kiralongrartemi Mumbai amakba ken o nung tai tonglokja alirtem rongnung ka, Hafiz Abdul Rahman Makki temelungjang tashidak agi süogo, ta Hokolbarnü osang ka ajanga metetdaksü.

Makki ya Mumbai amaksü atema asalentong yanglur tongti, Hafiz Saeed'er adianu kinüngbu lir. Makki ya Pakistan nung lia asü.

Nokdanga aliba organisation Jamaat-ud-Dawa (JuD)-i, parnok deputy chief, Makki anogo ishika temang mejungi liasü aser pa Lahore nung aliba nija hospital ka nung diabetes treatment tagidak liasü, ta metetdaksü.

"Tanep yakta Makki temelungjang tashidak agi asü," ta JuD ketdangser kati metetdaksü.

2023 küm United Nations-i Makki ya 'kiralongrar ka' ta

sangdonga liasü. 2020 küm anti-terrorism court kati kiralongra nung amshitsü atema senotsü agi yariba ken o nung Makki aija ita trok tepuokdak ayutsü obendang agüja liasü.

Pakistan Mutahida Muslim League (PMML)-i sangdong ka ajanga, Hafiz Abdul Rahman Makki ya Pakistan tangatetba ajungkettsür ka, ta metetdaksü.

2008 küm kiralongrartemi bomb aika amshia Mumbai amakba sülen taoba ita küm 16 jungogo. November 26 nü L a s h k a r - e - T a i b a kiralongrartem Pakistan nungi tzyim ajanga Mumbai tzyüküm tonga aruba sülen parnokia anogo pezü tashi yimti tesem balala amakdang nisung 100 dak tali tepseta liasü.

Taküm January ita nung Pakistan-i, India-i Pakistan nung kiralongrartem tepseter ta aitsü, ajisüaka India-ibo ibaji khenyongi tiyazü ta shiogo.



December 27, 2024 nü New Delhi nung Lok Sabha nung opposition lenir Rahul Gandhi, Congress Parliamentary Party chairperson Sonia Gandhi aser Congress MP Priyanka Gandhi Vadra nungeri taoba mapang Ato kilonser, Manmohan Singh nem akhüm agütsüdang tangokba noksa nung angur.

US-i küm anabuba India nunger nem visa million 1 dak tali agütsüogo

New Delhi, December 27 (Agencies): United States-i taküm agi küm anabuba India nungertem nem non-immigrant visa million 1 dak tali agütsüogo.

India nung US mission-i, 2024 küm International student teimba yokba linükji India liasü; 2008/2009 nunga International students teimba yokba linükji India liasü, ta metetdaksü.

US mission to India-isa, "India nunger aikati tourism, business aser shisaliok atema US semdangner; tesüiba küm pezü tsüngda India nungertemi US semdangbaji ponguben agi tali kümogo. 2024 küm mezüngbuba ita 11 (January nungi November) tashi nung India nunger million 2 dak temai US semdangogo, aser ibaji 2023 küm den medemdangra shilem 26 agi teimba lir," ta metetdaksü.

US semdangtsü atema India nunger million 5 ket nung non-immigrant visa lir aser anogo shia US mission-i visa meyirjang aika agütsür, ta US embassy in India-i metetdaksü.

US state department-i taküm US nung H-1B visa renewals atema pilot programme takok ngua tenzükogo aser ibaji ajanga India nunger mapa inyakerterem meyirjang aikati linük toktsür moui visa renew süteter. US State Department-i sangküm renewal programme ya maneni benoka inyakttsü.

India nung America nunger 24,000 dak temai US mission nungi passports aser consular teyari nguogo. 2024 küm Smart Traveler Enrollment Program (STEP) tenzüka liasü aser ibaji ajanga America nungertem den temelaba tongtepratepa security teyari agütsüteter.



December 27, 2024 nü New Delhi nung tzunglu arua tsüngsang mejungaka nisungtemi India Gate semdangba noksa nung angur.



TIR YIMYIM YIMOBILEM (EDITORIAL)

DIMAPUR

KÜPTOKNÜ

LUCHII 28, 2024

Tsüraburtembo shisamebulur nuo?

Tang Nagaland nungsa süaka, talisa, Dimapur aser Chümoukedima nung NSCN tenung amer Naga nunger peisasa pei teka agi anakteta taküm alirtem dang tashiyim agi sen meshia amokmerenba mapa ya tetsübutüsü aser shisabolutsü mapa tuluka lir. Ano, Naga nungertem rongnungsa süaka iba timtem lendong yagi Aor dakang bolua kongshiba ya asenok ajak asoshi shisabolutsü talila ka kümogo. Ibayongji, shisabolu marem tetsübutüsü lendong ajak tizükteta lanurtemi tetsübutüsü mapa inyakerkem anema ola adokba angashir aser angur. Iba ola jagi tanü asenok tsübudaktsüba lendong mapatem ya asenoki ngua suitemtsü imlar. Ajisüaka, kanga süngmanga bilemba kaji, kodangsa tanü amai senso tajung ka dak tashiyim agi sen meshiba timtem tetsübu agi kongshidir, lanur telongjemtem dak alaka tsürabur telongjemtemibo ola madoker. Asen loktiliba asoshibo, ano, ibajiang shisa tebuluba, kechiyong lendong timtem pateka agi asenok amokmeren dang ola madokba lokti telongjem tentettemjibo taküm masü aser taküm alinunga kanga tepezü, anungji temang ashiba, ayangba aser angoba memeteter. Atangji, tashiyim agi sen meshir anema ola adokbaji mi den asayar amai lendong keta lir. Ajisüaka, lendong tsübu mi nemji asenok ki ka khen, ka khen ta rongdoktsüyonga odaktsüra, asenok talidak makatsü, anungji mi agi ki arongtsü ama jangruteta alidangyongi atidaka melii inseptsüla. Tanü asenoki asen kinunger ka dak tangari kongshidang asenoki ola madokra, kasa tetsübutüsü timtemji kenü asen daka atongtsü, idangjibo asen asoshi ola adoktsür azü jang kata malitsü. Aji oda, tanü asen sensosangertem tsübudakja amokmerenba mapang ya tsürabur lokti tentettema longjemer menokdakra, iba tongpang ya asenoki masü saka sen meshia amokmerenertemi akoktsü. Idangjibo, asenok taküm alirtema asen kinunger asüpila sentep sentong nung dang ajuruteptsü. Ashiko, idangjibo asenok ajaki mulungzürep o tangashir ajak nüktzü alutsüsa shitettsüa akok. Aji oda, ashiko, asen kin mang metokshiba kin ta shia mang madak arleper süa amloktsütsüa akok. Ajisüaka, asenok tsüraburtem lokti tentetba nukjidongji aji masü. Joko, tanübo asenok ya tasü mang dang masü saka taküma dena metokshii senti süa züngshiba aser bushiba kin ka akümtsüla. Aji oda, asenok ya asüpila sentep sentong nung tasür nung sanga jembiba kin aser nisung masü saka taküm alidang kati ka nung sangtepa yatripteptsü aser kümzükteptsüba kin asert nübortem asütsüla. Tang ya Nagaland nung Naga yimten nüchiso bushitsü atema telok paikya menügdaker, iba atemajia lanurtemi dang masü saka tsüraburtemia ola adoktsüla. Asenokbo yamai asen nisung nem tashiyim agi sen meshia amokmerendaktsür saka tangarbo Naga nunger den Indiai yimjung yangluba mapa aser sentong meraksai aotsü asoshi Ceasefire Monitoring aser Supervision atema mendenbuba dena shima yur tulur küma ajangzükdaktsür. Ashiko, item jagibo Naga nunger yimten nüchiso bushir telok noklangkata kümdaktsünüa alitsüa akok, kechiyong Naga nunger yimten nüchiso bushiba mapa yagi parnok timtemdaktsür masü saka parnok maongka aser tajangzük tulu agir. Ibayongji, Naga nunger nüchiso bushir telok ka razüka oli, jet ta parnok nem India government-i kuli tajung agüja züngokli ta inyakba asenoki angur. Aji oda, Naga nunger yimten teblemstsü makok ser telok paikya razüka oa kümtepa ya asenok asoshi timtem aser shisabolu tulu akümer saka India government asoshibo parnok bilemba aser atongba sentong ataloker asütsü. Iba ama tensa tia ka nung, asenok Nagaland nung alir Naga nungertem asoshi Naga yimten nüchiso bushir tekok metsü dak tali mesütsüba ya tetsübutüsü teblemstsü tuluka kümogo. Iba ama tetsübutüsü lendong mapatem agi asen meketa atalok dang shisamebuluba senso aser shisabulua meinyakba lokti tentettembo tamachi asütsü. Atangji, tanü ya asenok tsüraburtema tamachi jilu aitsüba mapang masü saka nüchi kümer yiar mapa anema ola adoktsüba mapang lir.

OLEMSABANG

Anibelem dang Anisüngzüktsü Atema Exercise

Source - www.medicinenet.com



Tekolok anibelemba azüokba ajanga tekolok aser temang anaprongla nem tajangzük agütsür. Tekolok anibelemba mesüra shisabolutsü tensa ka nung exercise agiba mesüra anisüngzüktsü practice asübatem ajanga temang süngjemdaktsür. Na tekolok anibelem dang mesüra teblemstsü khurettem ajurudang tango sashiba indang exercise kar agi nung anisüngzük angutsü. Tsünglanglen agüja aliba exercise ya minute asem nungi pungu tashi aginung na anisüngzük angutsü.

Controlled Breathing Exercise:

1. Menden nung indangindanga menang.
2. Tanga kecha meblemi na tang aliba tensa-mapang bilemstsü merangang. Kokra tenük amur bilemang.
3. Nü tango sashiba nung temulung agüjang. Tenilen nungi tango tanemi sashiang, second ishika tetsüngda yur tango sashiang.
4. Nü tebang ajanga tango sashiang, nai tangok saketedang mapang agiba dang nungi anaben agi mapang teimba agia tango sadokang.
5. Iba amai minute 3-5 tashi tango sashitsü merangang.

Nai aginüra, iba tango sashiba exercise ya anogo nung minute 15 nungi 20 tashi agitsü merangang. Iba exercise ya anogoshi agiba ajanga, anibelem dang mesüra teblemstsü khurettem ajurudang nai nü sasa anisüngzüktsü.

Shini (Sugar)-i temang nung timtem agütsüba



Temang nung shini nungdaker, saka kodang temang nung shini tali lidir iba jagi temang yiria tulu kümdaktsüba dang masü saka nü temang nung tashidak mesen den raratsüba tashi (immune system) ajema kümdaktsür. Iba jagi shini tashidak tapu balala adoker. American Journal of Clinic Nutrition nung adokba osang ka ajanga ashiba agi, asenoki shini gram 100 achi shia asen temang nung mesen tamajung tepsetba white blood cell tashimait kümdaktsür. Anungji, tanang kangabo machiang tajungba.

Source - *The Prevention*, July 2014.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Khristmas sentong nung PM Modi jaokba anema longkak ait



December 23, 2024 nü New Delhi nung Catholic Bishops' Conference of India (CBCI)-i ayongzükba Khristmas sentong nung Ato kilonser, Narendra Modi aser putirtem tangokba noksa nung angur.

December 27, 2024: December 23, 2024 nü New Delhi nung Catholic Bishops' Conference of India (CBCI)-i ayongzükba Khristmas sentong nung Ato kilonser, Narendra Modi jaokba anema nisung 200-i longkak ait.

Ato kilonser Modi-i X ajanga, "Nenok ajak den Tepela Khristmas salem lemsateper. Kibuba Yisu Khrista tesayubatem ajanga ajak dang yimjung aser azükaru lenmang sayuang ta sarasadem," ta lemsatepa liasü.

"Khristantem anema inyakba kanga bulua akümer, ajisüaka Khristan lenirtemi Khristantem temeden kümzüksü atema meinyakba atema aitsüsang Ato kilonser Modi jaok," ta Mahatma Gandhi'er semchir Tushar Gandhi, activist Annie Raja aser putir, Cedric Prakash nungeri sign süa aliba shidi nung shia lir.

"Iba senden ya ajanga Arogo lenirtem aser atangji

nung timtem ajangshiba Khristantem tsüngda tesendaktep maliba temaitsü sayur. Taküm kija nung yimsü nung ajemdaker asen adianu aser aianu 745 anema inyakogo aser Manipur nung Tenla ki 200 dak tema raksatsüogo, anungji Khristmas sentong nung salemtepba ya tazungla lir. Sorkar nung tekolakji Ato kilonser lir aser linük nüchiso anguba sülen Khristantem anema inyakba kanga bulua akümbaji pa yimsüsüba kübok lir," ta meimchir temeden atema inyaker aser kaketzülur, John Dayal-i ashi.

Longkak aitertem jagisa, "January 2024 nungi November 2024 tashi nung India nung Khristan sensotem anema inyakba tatalokba 745 lir. 2022 küm den medemdangra iba küm nungjibo item ama tatalokba 486 dang liasü. Ano Modi sorkar akümba küm, 2014 nungbo item ama tatalokba 127

dang liasü," ta metetdaksü.

"K h r i s t a n t e m reshikangshiba kanga bulua akümba tongti kulitem rongnung kaji 'Hindutva nationalism' ajanga lir; iba ya ajanga Khristantem aser Muslim nungertem anema inyakba kanga bulua kümogo," ta parnokisa metetdaksü.

"May 3, 2023 küm Manipur nung raradang Tenla ki 200 dak tali raksatsü aser nisung jenti asü. Tang state sorkar 13-i anti-conversion ozüngtem benokogo aser iba ozüng ya tim mesüi amshia Khristantem anema inyaker," ta parnoki metetdaksü.

December 23, 2024 nü CBCI headquarters nung tang mezüng India Ato kilonser ka denogo. 1944 küm India nung Catholic Church headquarters amenokba sülen tang mezüng iba ama sentong ka nung Ato kilonser aden. Iba sentong nung Ato kilonser Cardinals, Bishops aser Arogo nung lenirtem ajurua liasü.

Congo nung Khristmas anogo nung nisung aika bapti

December 27, 2024: Democratic Republic of Congo (DRC) nung Khristmas anogo nung temeja sentong ka ayongzükba nisung 60 baptiogo.

Church Mission Society (CMS)-i Kadirisha, Masisi nung ayongzükba sentong nungji Khristan 60 bapti. CMS-i iba region nung Khristantem nungita yarir.

Masisi nung tesüiba küm aika raraan aruba sülen tang nisung 60 baptiba ya Khristmas sayatenya ka lir, ta CMS-i metetdaksü.

Sorkar sepaitem aser Rwanda-i pusemba M23 telungpurtem tsüngda iba region nung küm aika rarar. Mile ishika

tsüngda shia lenmang mokdanga aliba agi senzüsempojunga mesüteter.

Iba ama rara liaka Arogo lenirtemi maneni osangtajung proker aser Arogotem ainer, ta CMS-i metetdaksü.

Goma nung putir, Martin Gordon-i, "2023 küm nung onoki Arogo aika nung baptiba sentong agia liasü aser taküm küm kija nung Arogo 15-i Tenla ki mesüra pastor ki renemogo aser karbo mapang tatsüka tsüngda renemtsü," ta metetdaksü.

Tan ita tejaklen Gordon-i putir pongu 'ordain' süja liasü aser parnok rongnung theological college ka nung

principal aser internally displaced persons (IDPs) indang camp nung alirtem atema pastor ka densema lir.

Iba region nung tesüiba küm asem tashi kanga sashia raraba mapang nisung meyirjang aika jenshia IDP camp nung jenokogo.

CMS den jembidang Khristan kati, "Goma nung alirtemi, aonung amoi oaka anepdangbo mesaktsüa akok ta angateta lir. Onok anüandang kodak nung alir ama alir aser aonungbo molumi nung alir ama alir," ta ashi.

Rara ajanga yaküm Arogoi lapokba school 50 dak tali shibangogo.

Khristmas sempet Laishiba agütsüba atema tesayur ka anentsü

December 27, 2024: Telangana state nung aliba yimtsüng ka nung sorkar school tesayur kati Khristmas sempet nung Laishiba densema agütsüba atema mapa nungi anentsü, ta International Christian Concern (ICC)-i metetdaksü.

School tesayur, Gali Pullaiah-i Khristmas sempet bakos 100 shi tanurtem nem lemja liasü. Bakos shia nungji

stationery, tzü pongdang, Tasen Lai aser Khristmas card densema liasü.

Khristan organization kati school nung tanurtem nem lemstütsü atema Pullaiah nem Khristmas sempetji agüja liasü.

Pullaiah-i ashiba agi, tanurtem nem Khristmas sempetji lemstütsü atema pai school nung tekolak dang nungi jelia temelaba meshir liasü.

Tanurtemi sempetji agizüka

kidangi bener aoba sülen lapokdang Laishiba densema liasü, anungji tsüraburtemi iba osangji BJP nem metetdaksü.

Idangyongjisa BJP nung inyakertem school-i aoba sülen tesayur apu aser pa anema police nem ken o agüja liasü.

Tang Telangana nung Congress sorkar lir aser sorkari Khristmas amongtsü atema official süa Khristantem nem temelaba agüja liasü.

ANOGO ABEN TSÜNGREM DEN

Tangar Den Nokdakba

Ka dang nungi ana tajungba kechiaser parnoki inyakba asoshi taa tajung kar, kechiaser parnok alangra kati pa medemerji mesotsü saka kija alisang aiatai, kodang pa alangdir pa mesor shinga malitsü. Sayutsüngir 4:9-10.

Tetenzük nungi Tsüngremi Pa nübur kija alitsü majung ta ajitet (Lipok 2:18). Tsüngremi asenok yaritepa alitsü yanglu. Laishiba ajunga nung kija dang nungi teloki mapa tuluba inyaktetba Pai jemb. Tsüngremi asenok kija alitsü meyanglu, pei juri takok dang bushitsü Pai asenok meyanglu. Asenoki merangba nung takokji kati ka dak metaloka aliba ajanga angur. Iba jagi Pai arogoji tentet aser osangtajung prokshitsü asoshi tamangertem nem ain agütsütsü asoshi Tanela Temeshi yok. Asenok Tsüngrem yimli putirtem lir (1 Peter 2:9).

Kodang mepetmesü agi tongdir, kijai abentsü tasak. Saka asenoki teyariteper tembar yimtetta lira, parnoki ajungshiba aser teyari nungi asenoki tesünep aser tashi angur. Kati ka dak metaloktepa lira tatitangbai atitangdang asenok tekümzüker alir. Tatidang nung tsüker taküm kuliji shirnoki tangar den lungjema melii kija alir aser medemertemi züngoka malir parnokji asütsü.

Na khristan teloki züngdoka lira, Tsüngremi na asoshi kechi yanglu aji nai züdoker. Na temenen nung tsüksü lendonga lir. Shirnoki Tsüngremi mulungba den sendaktepa alitsü bushir; shirnoki parnok den tesendaktep alitsü bushir parnok den tesendaktep alitsü nai bushitsüla. Tsüngremi nungloktsüba mapa inyaktsü asoshi tangar teyari bushir ka na süang. Na meketa alir shirnok teyari nüngdaka lir parnok yarir aser tajungshir ka na süang.

Syria nung Khristmas süngdong ka rongdoktsüba anema longkak ait

December 27, 2024: Syria amangertem aliba linük ka lir. kübok Suqaylabiyah nung nisung Iba linük nung Kurds, kari Khristmas süngdong ka Armenians, Assyrians, rongdoktsüba sülen Khristantem, Druze, Alawite Khristantemi longkak ait.

December 24 nü nisung kari tejak nembanger arua Hopta ana tejaklen HTS Khristmas süngdong nung totzü teloki Bashar al-Assad yimsüsüba menden nungi inoktsüba sülen mi senoktsü.

Iba tatalokba sülen tang Syria yimsüsüba telok HTS nungi lenir kati lokti ka dang, anepdang tashi nungbo Khristmas süngdongji yanglutsütsü ta nangzük.

Khristmas süngdong HTS-i yimsüsüba dak sendakba rongdoktsüba tatalokba anema nung tasüngdangba ka Syria yimtiba, Damascus nunga langzüdang Kurdish-Syrian Khristan kati, "Mezüngbuba Damascus yimti nung, iba ya osang tajung. Kübok Kassa kiyong nung, Assad atsüngdokba sülen "Syria talenba nung salaogo HTS-i yimsüsüba dak sendakba anungji Syria nung masüba nung tasüngdangba ka nisungtem oadoktsüla" ta langzüdang Kurdish-Syrian ayimdena longkak ait. Bab Khristan kati, "Mezüngbuba Touma kiyong nunga longkak aiter Khristantemi Kangki aser nung, iba ya osang tajung. Syria nung wako amer, Reshikangshia nisung meyirjang "Onoki Kangki atema onok aika tepsetogo. Karbo sowar tanela tenla agütsütsü," ta akümer aser karbo teti atema ayimdena longkak ait. Temang lemter," ta metetdaksü.

Longkak aiertem rongnung kati, "Ozü linük nung ozü Khristan yimsü benshitsü atema temelaba magütsüra onok yangi malitsü," ta ashi.

Syria ya yimsü balala

tebilemstü katsür," ta ashi.

AO OSHI ANGAZÜKDAK: TANÜ ANGAZÜKTSÜBA OJANG



Tatsük

(n) sen (money)

* Tatsük ter agi süngo marok ka angur.

Tatsüka

(adj) talangka masü (shortly, short one)

* Mapang tatsüka agia onok ajaki sarasadem.

OLONG PAITEP # 7019

15x15 crossword grid with numbers 1-19 indicating starting positions for clues.

TIPILEN :

- 1. Mapang shia - (4)
5. Imlaba dang nungi teimba- (4)
6. Teyariteper / Temedanger - (6)
7. Jembiba yimya - (3)
10. Taküm jakla tajung - (5)
11. Nguyutep - (5)
12. Temadok - (5)
15. T ___ ng - (3)
17. Kecha tajangzük mali - (6)
18. A ___ sang - (4)
19. T ___ sa - (4)

LANGTSÜNGLEN :

- 1. Seret aika - (5)
2. Teputep - (5)
3. Yiruba zübo - (4)
4. Telempet - (5)
5. Mangyim-jashi mapang- (5)
8. Meshiyonga senzü - (4)
9. Ajunga - (4)
11. Tesangwa mali aküm - (5)
12. Tai kümtsü - (5)
13. Ozü akaba oset - (5)
14. Tamakok masü - (5)
16. Yagi masü - (4)

OLONG PAITEP # 7018 TELANGZÜBA

TIPILEN :

- 1. Aben, 4. Artsü, 7. Lisem, 8. Liwa,
9. Sarasadem, 12. Aket, 14. Mangu,
15. Anünü, 16. Ango.

LANGTSÜNGLEN :

- 1. Aruli, 3. Balala, 5. Suwar,
6. Belem, 9. Sүjak, 10. Aonung,
11. Dokan, 13. Tinu.

NAI-A YA METETTER MA



2024 küm nüburtemi online nung timtiba

bushiba asayar ter:

- Imane Khelif
Mike Tyson
Lamine Yamal
Simone Biles
Jake Paul
Nico Williams
Hardik Pandya
Scoie Scheer
Shashank Singh
Rodri

Meghalaya BJP-i Arrtsü ken o takaratüba nung bentettsü ayongzük

Shillong, Luchii/December 27 (Agencies): Meghalaya nung BJP-i sorkar dang Assam den arrtsü dak sendakba nung mapang talangka ken o mebentetti aliba bentettsü atema jenjang tapet agitsü ayongzükogo.

Meghalaya BJP-i Assam aitsüogo, kong BJP-i yimsüsüdar. Parnoki ashiba agi, arrtsü nung ken o mebentetti aliba tesemtem dak sendakba nung sensak asemtsü atema Assam sorkari memulunger.

BJP otongdar M Kharkrang-i ashiba agi, Assam-i mangatetep aliba tesemtem dak sendakba nung sensak

asemtsü atema tejangraba mali kümogo.

Kharkrang-isa, Assam sorkari item tesemtem nung terenlok maparen balala benoka inyakba ajanga ken o bentettsü atema parnok tejangraba maliba sayur, kechiyong parnoki item temsetem ya parnok meyong ta bilemer, ta ashi

Maneni Kharkrang-i ashiba agi, tesem trok nung ken o bentetogo, kechiyong item tesemtem nung Assam takhangba kangabo maliasü.

Ajisüaka sensaksem tanabuba shilem bangdaka lir aser Assam-i regional

committee tem den sensaksema inyaktsü asoshi kecha tejangraba mali, shirnok nem local stakeholders tem den sensak asemtsü atema nongloksür lir.

Assam aser Meghalaya na Arrtsü nung mangatetep ta 1972 küm Meghalaya state akümba mapang nungi adoka arudar.

State ana arrtsü km 885 lir aser tesem 12 tashi nung mangatetep adoker lir. Ken o bentettsü atema inyaktepa arudar kong 2022 küm March ita tenangzüktepa yangluba densema lir, ajisüaka tang tashi ken o ajungabo mebenteti lir.

3 x 250 MW units Lower Subansiri project 2025 küm renemtsü



Itanagar, Luchii/December 27 (Agencies): State meyong hydro power giant NHPC-i Brehostibarnü ashiba agi, Arunachal Pradesh kübok Gerukamukh tesem nung Subansiri Lower hydro project nung 250 MW unit asemprongla 2025 küm May ita tashi nungbo yangluzüksü aser tanungba 250 MW unit pongu ya 2026 küm May ita nung yangluzüksü.

Company-isa, 2023 küm October ita Sikkim nung Teesta-V power station amenoka aliba tesem

tzümetsüng agi kongshiba sülen sen crore 1,075.97 akoksaogo, ta metetdaksü.

Company-i regulatory filing ka nung ashiba agi, 2023 küm October 4 nü tzümetsüng agi teraksatsüba bener arutsüba ya sen crore 1,075.97 shi liasü, koba insurer nem metetdaksüogo.

Major Restoration Work (Civil & HM) Packages I nungi 5 tashi agütsüogo aser power station yanglushi tenzükogo, ta company-isa metetdaksü.

Maneni 2024 küm August

ita 20 nü anentsüh aluba ajanga teraksatsüba bener arutsüba ya sen crore 327.67 shi liasü.

Tzümetsüng aser anentsüh amala lendong balala ajanga teraksatsüba bener arutsüba ya tejangja asadangdar aser TRT & GIS tesem nungi jananongnatem aginba sülen tejangja metettsü.

Power station yanglyshitsü (E&M aser H&M) atema contract agütsütsü asoshi tendering inyakyim tetembanger dang lir, ta kasa sangdong ajanga metetdaksü.

China-i Brahmaputra nung dam yangluba ajanga Assam & Arunachal dak kongshitsü

Guwahati, Luchii/December 27 (Agencies): China-i Yarlung Zangbo ayong nung alima nung dam tulutiba yanglutsü atema agizükba sülen India aser Bangladesh nati süoki ia bilemer.

Iba ayong dang ya India aser Bangladesh nung Brahmaputra ta ajar aser ayong ya Assam aser Arunachal Pradesh ajanga yima aluba sülen Bay of Bengal nung yimoker.

Iba project ajanga Assam dak kanga mejungi kongshitsü, kechiyong Brahmaputra ayong dak state metaloker alir.

Mongintemi ashiba agi, iba tzünokdang ajanga taoba

mapang ayong yima aliba yimya dak kongshitsü, local ecology raksatsütsü aser tzi agi anünga kümdaktsüba den Assam aser Arunachal Pradesh naprongla tzümetsüng agi kongshitsü.

Iba den külemi China-i tzi ya tangaleni mesür ora ayonglanglen tzi agi anünga akümtsü, ta tsübua bilemer.

Maneni tzünokdang nungi ajungbena tzi chiokba ajanga tzümetsüng tesashi adoktsü akok aser iba ajanga Assam aser Arunachal Pradesh nung alir meyirejang aika dak kongshitsü. Iba project yagi ayong ecosystem aser iba ayong temeket nung aliba

tesemtem dak kongshitsü.

Iba tzünokdang ya Yarlung Zangbo ayong nung yanglutsü aser iba yagi küm nung electricity 300 billion kilowatt-hours dak tema adokdaksütsü, koba Gorges Dam asem indang capacity dang timba asütsü.

China nunger ketdangsurtemi ashiba agi, Tibet nung iba hydropower project yangluba ajanga tzümopung mesüra ayonglanglen tzi supply dak mekongshitsü.

China-i, Yarlung Zangbo ayongbanglen hydropower project tem benoka inyakogo aser ano project talila benoka inyaktsü atema sentong yangludlar.

ALI AYOKER

FOOTHILL LEMANG ANASA VIHOKHU NUNG ALILEPSA-AAYOKER. TALITSÜ KIMONG ATEMA TAJUNG ANUNGJI TALINUR TEMI IBA NUMBER NUNG CONTACT SÜANG. SQFT. NUNG 80/- DIRECT CONTACT : 6009530632 / 6009094225

S Korea parliament-i acting tir mapa nungi anentsütsü vote agütsü

Seoul, Luchii/December 27 (Agencies): South Korea indang parliament nung züngsem timba kati acting tir Han Duck-soo mapa nungi anentsütsü atema vote agütsüogo. Asia nung economy tulutiba rongnng pezübuba ya 2007-2009 global financial crisis sülen tang rongsenketzüing nung mepetmesü adoker aliba mapang ka nung tang iba ya atalokogo.

Züngsem 300 agi kúmetba parliament nung MP 192-i Hokolbarnü Han mapa nungi anentsütsü atema vote agütsü aser kasa mapang nung sorkar kúmteter aliba party nungi yimden yimsüsürtemi vote magütsütsü atema telemtetba agia liasü.

Tir Yoon Suk-yeol December 14 nü impeach sütsüba sülen Ato Kilonser Han yagi acting tir mapa bener liasü.

Tir Yoon Suk-yeol-i December 3 nü linük ajunga nung martial law benokba sülen pa mapa nungi anenja liasü.

Hokolbarnü Han impeach sütsüba sülen South Korea temzüing ozüing dak ajemdaker Finance Minister Choi Sang-mok-i acting tir abentsü.

Parliament nung opposition party tongtiba Democratic Party (DP) shirnoki menden 170 koka parliament azüoka lir parnoki Han mapa nungi anentsütsü telemtetba agia liasü. Han-i constitutional court nung mapa tazüing aliba süngdaksütsü atema justice asem meshimba sülen pa mapa nungi anenja liasü.

DP-i azüoka aliba parliament yagi Brehostibarnü nominee asem pusema liasü, saka Han-i ashiba agi, iba mapa asoshi nisungtem ya party ajaki mulunga magizük tashibo formally meshimtsü.

Acting tir ka mapa nungi anentsütsü atema simple majority mesüra two-thirds vote agütsüba dak sendakba nung ruling aser opposition party tem aser constitutional scholar tem tsüngda mangatettep adoka liasü.

Ajisüaka parliament speaker Woo Won-shik, shiba DP nungi lir pai ashiba agi, Han mapa nungi anentsütsü atema simple majority ka dang nüngdaker.

Al Jazeera osangbener Rob McBride-i Seoul nungi ashiba agi, linük parliament nung tatalokba balala ataloka arudar, kechiyong ruling People Power Party (PPP) nungi yimden yimsüsürtemi tir mapa nungi anentsütsü atema benokba anema mit atoka longkak aita liasü.

“Parnoki iba telemtetba ya shitak masü aser Han dang iba telemtetba ya süoki ia magütsü shia arudar,” ta McBride-i ashi. Parliament nung vote agiba

sülen Han-i ashiba agi, mepetmesü tali madokdaksütsü atema pai atsüngintsü aser constitutional court kati obendang agütsüba ata alitsü.

Constitutional court nung obendanger trokibosa Yoon mapa nungi agintsü atema pa impeach asüba ya agizütsüla.

Taküm küm tetenzüklen obendanger asem mapa nungi anenba sülen okadak obendanger trok dang lir, aser iba tetezü Yoon tir mapa nungi anentsütsü atema obendanger trokpronglai vote agütsütsü nüngdaker.

Yoon shibai, pai martial law sangdongba ya temzüing ozüing nung aibelen ka masü aser state anema inyaksangshirtem anema benokba lir ta shiogo, pa tang sorkar anema nokdaksü merangba aser tashi alia amishiba atema aija bushisüngdangdar.

Yoon impeach süa office mapa agizüker hopta ana majung tsüngda Han mapa nungi anentsütsü atema benokba ajanga South Korea nung ano mepetmesü tulu adokdaksüogo, kechiyong Yoon-i December 4 nü martial law benokba ajanga mepetmesü adokba mesüshi-i liasü.

Tir ka mapa nungi agintsü atema National Assembly nung two-thirds majority nüngdaker ajsüaka acting lenir ka mapa nungi agintsü atema kasa temzüing ozüing benoka inyaksü lateta mali.

PPP-i ashiba agi, Han mapa nungi anentsütsü atema MP two-thirds-ibo mulunga agizütsü nüngdaker.

Kasa mapang nung DP-i ashiba agi, cabinet züngsem ka agintsü atema simple majority vote dang nüngdaker asünung yimden yimsüsür 151-i mulungra pa mapa nungi anentsütsü.

DP den minor opposition party aser independent tem ajak senteper menden 192 koka lir anungji two-thirds majority atongtsü atema PPP MP ti indang vote bosa nüngdaker.

Hokolbarnü Choi-i, Han mapa nungi anentsüba ajanga linük rongsenketzüing nung kanga mejungi kongshitsü ta shia opposition dang parnoki iba jenjang agiba ya bilemdangshitsü mepeshia liasü.

“National state of emergency ka kübok linük rongsenketzüing aser nüburtem libaliro jenjang kanga mejungui lir aser ano tanga acting tir kati tir mapa agizükba ajanga kechi ataloktsü aji mejangja,” ta Choi-i ashi.

Hokolbarnü US dollar den medemdangra South Korea indang won kanga ajema aküm aser 2009 küm March ita sülen tang mezüingbuba 1,480 won teküboki lua liasü.

JAPANESE LANGUAGE PROGRAM

C-Edge College | **JAPAN FOUNDATION NEW DELHI**

Experienced and highly qualified Tutors!

ONLY 7,500 / COURSE

Free 2 day Trial Class

Limited participants, Register Quickly !!

Registration open for January - June, 2025

Package :	Class Duration :
. Speaking	Twice per Week (Weekdays & Weekend Class)
. Reading	
. Writing	
. Listening	

Registration & Information :
 Call/WhatsApp : +918732841046
 email: maongjamir2018@gmail

Azerbaijan indang tayimtsü tsükokba bushisüngdang

Baku, Luchii/December 27 (Agencies): Azerbaijan indang tayimtsü ka Kazakhstan nung tsükokba bushisüngdangba sülen iba tayimtsü ya Russia indang air defence systems-i khazüka yok ta ngutetogo, ta media sangdong balala ajanga metetdaksü.

Azerbaijan Airlines Flight 8432 ya Bodhbarnü southern Russia kübok Chechnya tesem yimtiba Grozny-i oya aliba mapang Aktau yimti anasa tsükoka liasü. tayimtsü tsükokba lendong nung nisung 38 asü aser nisung 29 yirua liasü.

Tayimtsü tsükokba indang ngutetbatem Azerbaijan-i tang tashi yimjak nung sangdonga mali, ajsüaka ketdangsürtemi tayimtsü ya Russia indang anti-aircraft missile-i khazüka yok ta asatetogo ta Euronews, Wall Street Journal, Anadolu Agency aser Reuters news agency-i Brehostibarnü sangdonga liasü.

Source kati osang agütsüba dak ajemdaker Reuters-i ashiba agi, tayimtsü ya Grozny tonga aoba mapang electronic warfare systems agi communications lemte kümdaksüba sülen Russia indang Pantsir-S battery kati kongshia liasü

Tayimtsü dak ya asa missile khaloktsü masü asütsü ta amanger ta source-i ashiba Reuters-isa metetdaksü.

Euronews-i ashiba agi, tayimtsü anirtemi emergency landing atema mepeshiba sülen iba tayimtsü ya Russia nung anentsü memela aser Aktau leni Caspian Sea adena aotsü tetuyuba agüja liasü.

Russia indang Federal Air Transport Agency-i ashiba agi, ozü tetem ka dak tsükshiba sülen iba tayimtsü ya ajungbena anentsüsa aküm.

Tayimtsü tepen len raksar aliba asadanga sülen Aviation

experts temi tayimtsü tsükokba ya Russia indang air defences-i asütsü ta ashiba sülen ken o nung Russia sendaka aliba indang sangdonga liasü.

Embraer 190 ya Russia kübok North Caucasus len senzür aser hopta ishika tsüngda Ukraine indang drone temi maka arudar aser Russia indang Ministry of Defence-i ashiba agi, parnoki Mongolbar aonung aser Bodhbar anepdang drone aika khazüka yokogo.

Tayimtsü tsükokba video koba social media nung prokshia liasü, iba video nung tayimtsü ya yimya ama masü yimoka aitba sülen ali nung tsükoka mi adokba nguogo.

Ken o dak sendakba nung Kremlin otongdar Dmitry Peskov-i osangbenertem dang, “bushisüngdang metembang tsüngda ken o tembanga jembira aji tai asütsü,” ta ashi.

Israel-i Yemen nung Houthi pur tamendakdak amak

Tel Aviv, Luchii/December 27 (Agencies): Israel Air Force-i anüolen tzüküm aser Yemen teyongtsü nung Houthi telok military tamendakdak balala makogo, ta Israel Defence Force (IDF)-i metetdaksü.

IDF-i ashiba agi, tayimtsü amshia item tesemtem amaktsü asoshi Ato Kilonser, Defence Minister aser Chief of the General Staff of Israel nungeri temelaba agüja liasü.

Israel Air Force-i military inyakyim balala atema amshiba Houthi military infrastructure tem makogo. Tesemtem rongnung Yemen anüolen tzüküm nung Al-Hudaydah, Salif aser Ras Kanatib port tem densema lir.

“Houthi kiralongrartemi UAV aser surface-to-surface missile tem amshia Israel aser lispourtem maka arudar. IDF-i amakba tesemtem rongnung

Houthi kiralongrartemi Sana indang International Airport aser Hezyaz and Ras Kanatib power stations nung military inyakyim balala atema amshiba military infrastructure tem densema lir. Iba den bendenloksema IDF-i anüolen tzüküm nung Al-Hudaydah, Salif aser Ras Kanatib port tem nung military tamendakdak balala makogo,” ta IDF-i X nung post ka ajanga metetdaksü.

Maneni IDF-i ashiba agi, item military tamendakdak balala ya Houthi kiralongrartemi Iran nung yangluba prangbong injang aser hadir balala shibelener arutsü atema aser Iran nung ketdangsürtem anioktsü atema amshir.

“Iba ajanga Houthi puri military inyakyim balala atema civilian infrastructure tem amshiba tatishitsü sayur. Houthi kiralongrartem ya Iranian axis of terror nung tongtibang shilem

ka lir aser parnoki linük balala indang rongtem amakba ajanga iba tesem aser alima ajunga tamendakdak anokshitsür. Houthi kiralongrartem ya autonomous kiralongrar telok ka ama inyaksangshir, shirnok senotsü aser tanga teyari balala atema Iran dak metaloker lir. Israel aser lisopurtem amokmerenertem anema jenjang agütsü atema IDF atidaka malitsü,” ta IDF-isa shisem.

December 19 nü Israel-i Yemen nung Houthi pur tamendakdak balala amakba sülen tang IDF-i ano Yemen nung tesem balala makogo.

IDF-i ashiba agi, Houthi teloki missile aser drone tem amshia Israel amakba sülen Israel indang fighter jets temi Yemen nung Houthi pur tamendakdak balala makogo, ta Times of Israel sangdong ka ajanga metetdaksü.

Sporting Lisbon-i coach Pereira mapa nungi anentsüogo



Luchii/December 27, 2024

(Agencies): Joao Pereira shiba Amorim Manchester United-i aoba sülen November 11 nü Sporting Lisbon coach asütsü shima liasü, pa Brehostibarnü mapa nungi anentsüogo aser pa melena Vitoria de Guimaraes nungi Rui Borges shimogo.

Pereira ya Sporting nungi asayar ka liasü aser iba team Portuguese league nung mezüngbuba aser Champions League nung tanabuba jenjang nung aliba mapang team coach kuma liasü.

Sporting pur Portuguese league nung Benfica sülen tang

tanabuba jenjang nung lir aser Champions League nung asaya ana asayatsü anunga lia 17buba nung lir. Temaba jenjang nung aliba team ti round of 16-i indang indanga aitsü, aser jenjang tekububa nungi 24buba tashi nung aliba team tem playoffs asayatsü.

Sporting coach mapa agizükba sülen Pereira lenisüba nung par team-i asaya ti nung asaya asem kokogo, kong Champions League nung Arsenal pur goal 5-1 agi makokba asaya densema lir.

“Tarutsü tasak asütsü ta ajaki meteta aliba mapang ka nung João Pereira club nung aden,”

ta Sporting tir Frederico Varandas-i ashi. “Tiamaka pa onoki aginüba ama masü ta asatetogo,” ta paisa shisem.

“Rúben Amorim-i club toktsüba ajanga aoksatepba aser tetsükdaktsütem aliba indang onoki meteta liasü. Iba den asayatem aika yiru, koba ni iba club tir asüba mapang nung khen danga ajangshidanga mali aser iba den referee tem telemtetba kar onok anema liasü. “Ni João Pereira tali meyaritetba atema sasa bilemer. João tarutsü nung takok nguyonga aotsü imlaja atar aser pa sempet aser yimya tajung aketba nisung ka asünung takok nguyonga aotsü temulung lema bilemer. Pa mapa nungi anentsütsü atema João Pereira den sensaksema mapang pai payoff ama poisa ka danga aginüba maliasü,” ta pai ashi.

Varandas-i ashiba agi, Borges shimba ya tapak tasen ka lapokba asütsü, shibai Vitoria de Guimaraes nung pa mapa tokja liasü.

“Pa ya onoki küm ka dak tema asadanga aliba coach ka lir, shiba pa career nung maneni renloka odar,” ta Varandas-i ashi.

“Sporting pur lenla ajak nung taküm lir aser takokba tashi takok marok ajak atema radar aser maneni raratsü,” ta paisa shisem.

Ind vs Aus: Test pezübuba nung Australia jenjang tajungba lir

Luchii/December 27, 2024

(Agencies): India aser Australia na tsüngda Test pezübuba tananübuba nung Australia nung bowler temi ball kanga junga aonba sülen India nung top order tem kanga kara out süja mezüngbuba innings nung parnok jenjang tajungba lir.

Mezüngbuba Innings nung Steve Smith-i Test asaya nung century 34buba yanglua Australia team jenjang kanga junga kümdaktsü.

Melbourne Cricket Ground nung Hokolbarnü asaya tembangba mapang tashi nung India team-i asayar 5 pur sür run 164 yanglur ano Australia run 310 agi memenepe liasü. Mezüngbuba innings nung Australia-i run 474 yanglu aser parnok rongnungi Smith-i run 140 yanglua liasü.

Hokolbarnü asaya tembangba mapang tashi nung Rishabh Pant (run 6) aser Ravindra Jadeja (run 4) na batting mena liasü. India team-i run 153 yanglur asayar 2 dang out sür liasü saka asaya tembangtsü ghonda tasadang ka dang lia India nung asayar asem out asüba ajanga team jenjang mejungi aküm.

Scott Boland aser Pat Cummins nati wicket anana agia liasü.

Ckipper Rohit Sharma ya yimya agi opener asayar saka test anabuba nung pa trokbuba nung asayadar, ajisüaka pai junga masayateti arudar aser Hokolbarnü pai run asem dang yanglur Cummins-i out süja liasü.

Cummins-isa, süngo ajemtsü atema asaya anena atatsü asoshi tatebangbuba ball aonba mapang form nung alisang KL Rahul out süja liasü. Rahul-i run 24 yanglu.

Ajisüaka opener Yashasvi Jaiswal-i kanga junga asaya aser pai run 82 yanglua liasü.

Arishi küm 22 tain asayar shibai Perth nung mezüngbuba Test asayaba mapang run 161 yanglua liasü, pai ano century ka yanglutsü ta bilema aliba mapang Virat Kohli den meyoktepba sülen out asü.

Boland-i ball aonba mapang Jaiswal-i run ka agitsü atema asem tenzük saka pa indang teammate-i masemba sülen pa out süa liasü.

Kohli shiba, Australia nung asayar Sam Konstas dak tapu agi tsükoktsüba atema pa indang anogo ka atema match fee shilem 20 senchi chia liasü, pa run 36 yanglua aliba mapang Boland indang ball nung Alex Carey catch out süja liasü. Boland-isa nightwatchman Akash Deep out sütsü.

Premier League: Liverpool temaba jenjang nung Point 7 agi timba kümogo

Luchii/December 27, 2024

(Agencies): Brehostibarnü Leicester goal 3-1 agi akokba sülen Liverpool pur Premier League nung tanabuba jenjang nung aliba team dang nungi point tenet agi teimba kuma maneni temaba jenjang nung lir.

Asaya nung Leicester atema Jordan Ayew-i goal ka idaktsüba sülen Arne Slot-i aniba team ya aoksadakja liasü, ajisüaka parnoki asendenshir kanga junga asaya aser asaya mezüngbuba shilem metembang tsüngda Cody Gakpo-i goal ka idakja goal kasasa aküm.

Asaya tanabuba shilem nung England midfielder Jones, shiba top-flight nung asaya 100buba nung asaya liasü, pai tanabuba goal idaktsü.

Maneni asaya nung Liverpool atema Mohamed Salah-i goal tasembuba idakja parnoki asaya akok. Iba asaya nung goal ka idaktsüba ya Salah atema tang asaya aliba season nung goal 19buba liasü.

Iba asaya akokba ya Liverpool atema taoba asaya 13 nung asaya 11buba akokba

liasü aser parnok tanabuba jenjang nung aliba Chelsea dang nungi point tenet agi timba kümogo, shirnok Fulham-i goal 2-1 agi koka liasü.

Liverpool pur tang asaya aliba season nung league asaya 17 nung khen dang tamakok ngur lir.

Jurgen Klopp melena Slot club nung adenba sülen parnoki tetoktepba ajak nung asaya 26 nung 22 kokogo.

Tanga asaya ka nung Manchester United pur Wolves-i goal 2-0 agi kokogo. Iba asaya nung captain Bruno Fernandes nem red card agüja liasü.

Wolves pur coach tasenba Vitor Pereira lenisüba nung asaya ana asayaba anaprongla kokogo.

Asaya nung Wolves atema Matheus Cunha-i mezüngbuba goal idaktsü aser iba sülen Hwang Hee-chan-i tanabuba goal idakja liasü.

United pur Ruben Amorim lenisüba nung Premier League asaya tenet nung ana dang akokba sülen jenjang 14bubai asepzüka luogo.

Halep yiruba ajanga Australian Open masayatsü

Luchii/December 27, 2024

(Agencies): Simona Halep temekok aser tapu nung tashiba ajangshiba sülen Australian Open qualifying nung masayatsü atema telemtetba agiogo aser la 2025 season menorang tenzükttetsü.

Taoba mapang world number one asayar nem taoba hopta asayamung ayongertemi iba asayamung atema wildcard agütsü, ajisüaka la Abu Dhabi nung World Tennis League exhibition asayaba sülen temekok aser tapu nung timtem adokba ajanga masayatetsüsa kümogo.

Halep ya tenokdangba agütsür aliba mozü amshiba atema küm pezü atema tenokdangba agütsü, ajisüaka tenokdangba ya taküm ita teku dang kümstüogo. La mapang ana tashi nung ozüing alema inyaksangshiba atema aitsüogo, saka lai la kecha nunga aibelena mali ta shia aruogo.

Tenokdangba agütsür aliba nungi meyipa aruba sülen taoba mapang French Open aser Wimbledon champion ya asaya tenzükshitsü merangdar, ajisüaka tang yiruba ajanga tetsükdaktsü adokdaktsüogo.

“Kü team den sensaksema



sülen onoki ni season tera menorang tenzüksü atema telemtetba agiogo,” ta Romania tsürula yagi Instagram nung zülutsü.

La taruba hopta Auckland Classic nunga masayatsü, koba Australian Open atema warm-up asayamung tongtibang rongnung ka lir.

Halep shiba 2018 küm Australian Open nung runner-

up liasü, la tang world ranking nung jenjang 877buba nung lir.

Lai ashiba agi la anisüngzüktü aser February ita tetenzüklen Cluj, Romania nung asayatsü aliba asayamung nung asayatsü sentong lir.

Australian Open atema qualifying ya January 6 nungi 9 tashi asayatsü aser 2025 küm atema mezüngbuba Grand Slam ya January 12 nungi tenzüksü.

BILEMDANGANG

“Nisung ka tepelaji pa teshisadangba jenjang dak metaloka lir.”